

Pablo Filipos Anoafu Kirika Kenexõ Fomani

Pablo karaxa mēraxõ a Nios Ifofaafu Filipos anoafu ato kirika kenexõ fomani

¹ Ēkĩa Pablo, Timoteo feta nõ Jesucristo yonoxomis. Nāskakē nā Epa Nios Ifofaafoya nā mātō xanĩfofoya a mato kexemisfo nõ kirika kenexõ fomaĩ mā tāpinõ. Nā pexe rasi Filipos anoafu nõ fomaĩ, nāfofi Jesucristo afe yorafoki. ² Nõko Epa Nios feta nõko Ifo Jesucristo mato noikĩ mato sharafai kiki mato inimamakĩ mā anā fekaxteyamanõ mā isharakõinõ.

A Nios Ifofaafu Pablo ato kīfixopaoni

³ Nā ē mato shināitĩa, ē Epa Nios aichofa fafaĩini. ⁴ Ē Epa Nios kīfikĩ mēxotaima inimakõikai keyokõĩ ē mato kīfixõfafaĩini. ⁵ Mā efeta Jesucristo chanĩmara fakĩ taefanitĩa, iskaratĩari mā efeta Niospa meka shara Jesucristoõnoa mā ato yoimis. ⁶ Chanĩmakõĩ ē yoi, nā Epa Niospa mātō õiti mato shara faxoni keskakakĩ nē askakõifa fafaĩini nā Jesucristo oaitĩa. ⁷ Nāskakē nānori shinākĩ ēfe õiti mēraxõ ē matoõnoa shināfafaĩini, ēmāi mato noikõikĩ nā Epa Niospa ea sharafai keskakakĩ mārīmāi efeta meemiskē. Akka ea karaxa mēra ikimanifo. Nāskakaxõ xanĩfofofāfe ferotaifi ea iyomisfo anoxõ ē ato yoisharanõ Niospa meka sharaõnoa afe ĩpaxanõfo. Iskafakĩ ē ato yoimis: “Jesús noko nāxoni nõko chaka noko soaxoxiki nõ afe ĩpaxanõ,” ixõ ē ato yoimis. ⁸ Epa

Niospa tãpia keyokõi ã mato noikõiaito a nõko Ifo Jesucristo noko noikõiai keskafakĩ. ⁹ Ë mato Nios kĩfixokĩ iskafaxõfafãini, mã nõinãi finakõinõ, askatari mã tãpisharakõixõ nikakõisharayanã mã tãpikõinõ. ¹⁰ Nãskaxõ afara sharakõifo tãpixõ katonõfo. Nãskakanax isharakõitirofo, afaa chakakai matoõ netiroma, matoõnoari afara chaka yoitirofoma mã Cristo oaino. ¹¹ Nãskaxõ mã Jesucristo mato sharafai keskafakĩ, mãri askafatiro. Mã askaito mato õikĩ fetsafãfe mato yoikĩ iskafatirofo: “Aicho, nafa isharakõiafo Epa Niosnoax. Nios fãsi sharakõi,” ixõ yoixikani. Nãnori matoõxõ ã Epa Nios kĩfifafãini.

Ë shinã ã Cristo fe rafepakenaka

¹² Efe yora mĩshtichi, mã tãpinõ ã mato yoinõ. Ea karaxa mẽra ikimafiafono, akka ã mẽxotaima Niospa meka sharaõnoa ã ato yoifafãini afe nĩpaxanõfo. ¹³ Nãskakẽ sorarofãfe xanĩfãfe pexe anoxõ fetsafo feta mã tãpiafo ã karaxa mẽra ikẽ Cristo Ifofai. ¹⁴ Ë karaxa mẽra ikano mã nõko Ifo Jesús Ifofaafãfe atirifãfe Niospa meka sharaõnoa ato yoikakĩ mesetamakõi inimakõikai nõko Ifoxõ ato yoikani.

¹⁵⁻¹⁷ Chanĩma, fetsafãfe Cristoõnoa meka shara yoifikakĩ ea finõpaikani, ea shinãchakamapaikakĩ. Akka fetsafãfe ea noikakĩ eõnoa shinãmisfo iskafakakĩ: “Pablo karaxa mẽra ikimafiafono Epa Niospa meka yoiaito tsõa xatematiroma Jesúsnoa ato yoiaito nikakõinõfo,” ixõ Jesúsnoa yoisharatirofo. Akka fetsafãfe Cristoõnoa yoikakĩ: “Noko nikakõinõfora,” ixõ ato yoipaikani ea finõpaikakĩ ã karaxa mẽra ikano. Akka fetsafãfe ato noikakĩ ato yoisharamisfo, mãmã tãpikaxõ

nonoxõ ã Cristoõnoa meka shara yoimiskẽ afe nĩpaxanõfo. ¹⁸ Akka nãskanõ, nã yoipaiyai keskafaxõ Cristoõnoa ato yoinõfo. Nãskafakĩ ato yoiiafono nikai ã inimakõini.

¹⁹ Akka mẽ tãpia ã inimakõi, mã ea Epa Nios kĩfixonaito nikai Jesucristo ãfe Yõshi Sharapari ea axõfaino. ²⁰ Epa Niospa ea amapaiyai keskara akiki ã rãfitiroma. Ranotamakõi ã yoitiro. Ë askafakĩ yoiaito õikakĩ fetsafãfe Cristoõnoa shinãkõinõfo. Nãskakẽ ã nayoamax ã niyoya sharakĩ. ²¹ Akka Cristo fistiõnoax ã ĩpanaka, akka ã nairi sharafinakõia, ã inimakõi ĩmãĩ Cristo fe nĩpaxakĩ. ²² Akka ã niyoxõ fetsafo Cristo ã ato chanĩmara famatiro afe nĩpaxanõfo. Akka ã fato katotiroma, nia rakikĩa shara, askayamai naa rakikĩa shara. Ėkai tãpiama. ²³ Akka fekaxkõi. Nã rafe sharafiax fato ã katotiroma. Akka ã napai Cristo ari kaax afe ĩpaxakĩ, nã sharafinakõia ã mei. ²⁴ Akka fetsari nã sharafinakõia ã shinãĩ, mã ea yopai Niospa meka shara ã mato yoinõ. ²⁵ Mẽ tãpia mãmãĩ ea yopakõiaito, askatari mẽ tãpia ã nayoamax ã mato fe iyoikai. Niospa meka shara ã mato yoiaino mã inimayanã chanĩmara fakĩ mã finakõinõ. ²⁶ Nãskakẽ ã anã mato fe ikaino mã inimaifinakõixii Cristo Jesúsnoax.

²⁷ Akka shinãsharata isharakãfe. Nãskaxõ na meka shara Jesucristoõnoa chanĩmakõi yoixikakĩ. Mã askaito ã mato õikanõ, askayamai chai ixõ ã matoõnoa nikakĩ ã tãpitiro mã Jesús Ifofasharaino nãskara fisti shinãkaxõ. Nãskaxõ keyokõĩ Niospa Yõshi Sharaõxõ fetsafo mã ato Jesús chanĩmara famaxikãki. ²⁸ Mã askafakĩ yoiaito a mato noika-spaifãfe mato mekakĩ xatemapaiyaifono rateya-

makãfe. Nãskakẽ mã atoki rateyamaito õikakĩ tãpitirofo akka nãfo fenokõikani, akka mã fenotama Nios fe mã nĩpanaka. ²⁹ Epa Niospa mato sharafaxõa mã Cristo chanĩmara fata aõnoa mãri mã omiskõinõ. ³⁰ Ë ikai keskai mã efe omiskõimis. Mã mã ea õipaoni ã omiskõiaito, iskaratĩari mã mã ea nika Cristoõnoa ã omiskõiaito nãskafixõ ã eneima Niospa meka ato yoikĩ.

2

Cristo nono mai anoax afama iyopaofinixakĩ iskaratĩa xanĩfo finakõia

¹ Nãskakẽ Cristo mato inimama mato noikĩ mato inimamashara ãfe Yõshi Shara mato fe ika. Chanĩma, Cristo mato noikĩ mato inimamashara mã mã meemis. ² Nãskakẽ ea inimamakõikãfe, Isharakõita keyokõichi nãnorifos shinãkãfe. Mã ranã nõinãsharakõikãfe. Nãskakẽ Jesús mato amapaiyai keskara fisti axikakĩ. ³ Akka fetsafo afara axotama a mã mã afara apaiyai keskara fisti shinãyamakãfe, askatari fetsafãfe eõnoa yoisharakõinõfora ikax kakapaimis iyamakãfe. Askatamaroko isharakõita fetsafoõnoa yoikĩ iskafakãfe: “Nafãfe ea finõtirofoki. Akka ãkai afama. Jesús fisticchi ea imasharatiro,” ixõ fetsafo finõpaiyamakãfe. ⁴ Askatari a mã mã fichipaiyai keskara fisti shinãyamakãfe, askatamaroko a fetsafãfe fichipaiyaifo keskarafori shinãkãfe.

⁵ Nãskaxõ nõko Ifo Jesucristo shinãi keskafakĩ mãri nãnori shinãkãfe. ⁶ Nãfi Nioskõikĩ Apa Nios keskara ari onifafianino yoikĩ iskafapaonima: “Ëri ã Nioskõi nã ãfe Epanãfori ãfenã. Nãskakẽ ãfe Epa nai mẽra ika keskariai ã nono mai ano

itiro. Ĕ askaito afanã ea afeska fatiroma,” ixokai anori Jesús shinãpaonima. ⁷ Askatamaroko Jesús ãfe sharafoya ãfe afama mĩstifo potayoni, nono mai ano oax ato yonoxomis keskara ixiki. Nãri fake feronãfake kãitiro keskai, feronãfakekõi kãini. ⁸ Feronãfakekõi ixõ isharakõixõ Apa Niospa yoiyai keskara nikakõiax nani. Afara chakafamis keskarax ifi cruz ikakinoax omiskõikai nani. ⁹ Nãskakẽ Epa Niospa xanĩfo finakõia imani, nãatofi keyokõi finõinĩfofanakĩ. ¹⁰ Nãskakẽ Jesús keyokõi ato finõano ãfe ane nikakakĩ keyokõichi akiki ratokonõ mai chachikaxõ yoikĩ iskafaxikani: “Jesús, mĩfi xanĩfo finakõiakĩ,” ixõ yoixikani keyokõi nã nai mẽranoafoyaxõ nono mai anoafãfe. Askatari nã Ifofax namisfãferi askafaxikani, niafakafãferi askafaxikani. ¹¹ Nãskafaifono keyokõichi tãpixikani, “Jesucristo nõko Ifora,” faifono. Askafakãki Apa Niosri inimamakõixikani.

Jesús Ifofaafãfe ato õimasharatiro afeskax isharatirofomãki, a Jesús Ifofaafoma

¹² Nãskakẽ ěfe yora mĩstichi, ě mato fe ixõ ě mato yoiaito mẽxotaima mã ea nikapaoni keskafakĩ, ea nikakĩ finakõikãfe iskaratĩa ě chai ikakĩ nono karaxa mẽra. Jesús mãto chaka mato soaxonõ isharakõita shinãsharakõikãfe afe ĩpaxakakĩ kachikiri fakakĩma. Nãskakẽ meseyanã nikakĩ finakõifafãikãfe Niospa mãto chaka mato soaxonõ. ¹³ Niospa mãto shinã mẽraxõ mato shinãmafafãini a mato amapaiyai keskara mã anõ. Nã apaiyai keskafakĩ, nãnori mato shinãmapai.

¹⁴ Nãskatari nã mato amapaiyai keskara akãfe, yõachẽpekakima, askatari feratenãyamakãfe, ¹⁵ mã

isharakōiano tsōa matoōnoa afaa chaka yoiya-manō. Askatamaroko yora chakafo mēra ikax mā isharakōiaito mato ōitirofo māmāi Niospa fakekōiax afaa chakafamisma. Akka mā ato mēra ixō ato ōimasharakāfe, oa fakishi fishifāfe chai chaxatiro keskafakī. ¹⁶ Nāskaxō Niospa meka sharaōnoa ato yoifofāfōfāikāfe afe ĩpaxanōfo. Nāskakē mā Cristo oaino ē matoōnoax inimaifinakōitiro, ēakairoko kaxpa Niospa meka ē mato tāpimanax, askatari ēa ē kaxpa yonomisma. ¹⁷⁻¹⁸ Ĕ mato yoisharamis mā Jesús chanīmara fakōinō. Akka Epa Nios ē yoitiro iskafakī: “Epa Niospa, ea mīa yoini keskafakī Filiposo anoafō mī Fake Jesúsnoa ē yoimis. Nā chanīmara fakōinōfo, a mī ato yoiai keskara akōixikani. Ĕ mia ato chanīmara famaōxō ea retexikani rakikīa,” ixō ē Epa Nios yoitiro. Akka ea retefiafono eōxō mā Jesús Ifofaano ē inimatiro. Nāskakē mārī efe inimakāfe Niospa ea sharafaino matoōnoax ē natiro.

Timoteo fe Ipafrodito

¹⁹ Nōko Ifo Jesucristo nīchipaiyaino ē matoki samamashta Timoteo nīchipai mato ōikanō. Mā anā oxō matoōnoa ea yoiaito nikai ē inimakōixii. ²⁰ Akka tsōakai efeta iskafakī shināima, Timoteo fistichi shināi ē shināi keskara. Chanīma, na Timoteo mato noikōikī matoōnoa tāpipai mā Jesús Ifo sharafaamāki. Akka tsoakai na Timoteo keskarama. Nāskaxō ē mato noiai keskafakī nāatori mato noikōi. ²¹ Akka fetsafāfe āakōi apaiyaifo keskara fisti shināmisfo. Cristo Jesús ato amapaiyai keskara amisfoma. ²² Akka mā mā tāpia na Timoteo isharakōixō mato ōimamis efeta Niospa meka sharaōnoa ato yoimis. Nā fāke

ãfe apa feta yonotiro keskafakĩ na Timoteo efeta yonosharamis. ²³ Nãskakẽ Timoteo, ẽ mato ano nĩchipai mato õikanõ. Mẽ tâpixõ ẽ afeskaimãkai, akka mẽ tâpixõ mato ari ẽ Timoteo nĩchi eõnoa mato tâpimanõ. ²⁴ Akka ẽ nõko Ifo chanĩmara fai, ea mato ari nĩchiaino samamashta kaxõ ẽ mato õikai.

²⁵ Akka ẽ shinã nofe yora Ipafrodito mato ari nĩchipaikĩ. Fekaxfiano nãato efeta yonokõimis na Ipafrodito mã ekeki nĩchini, ẽ afara yopaito ea axonõ. ²⁶ Na Ipafrodito mato õisharapaikõĩ, mato shinãkõĩ mãmãi nikamiskẽ isinĩ ikaito. ²⁷ Chanĩma, na Ipafrodito isinĩ ikõini, mã nakerati. Nãskaino akka Nios aõ noikõikĩ mã sharafaita, eari noikõiyana. Akka mã naano ẽ shinãmitsaifinakõikeraita. ²⁸ Nãskakẽ ẽ mato ari nĩchipaikõĩ mã inimakõinõ matoki anã nokoaino, ẽri shinãmitsakõiyamaxiki. ²⁹ Nãskakẽ matoki nokoaito inimayanã ifisharakõikãfe nõko Ifoõxõ. Nãskakẽ nã mã Ipafrodito noiai keskafakĩ nã keskarafori fetsafo noikõikãfe. ³⁰ Akka na Ipafrodito Cristo yonoxoni mã nakeraita. Akka mã chai ikax ekeki oyamaino matoõnoa omiskõinixakĩ nã Ipafrodito ekeki oyamea ea axosharaxiki.

3

Jesús chanĩmara faafo a chanĩmara faafoma mẽra ikaxõ ato õimatiro afeskax isharatirofomãkĩ

¹ Efe yora mĩstichi, iskaratĩa nõko Ifoõnoax inimakãfe. Mẽ mato kirika kenexokatsaxakĩ, anã ẽ mato yoi. Akka mã nikakõisharanõ ẽ mato yoi. ² Kexemesharakãfe, a yora chakafo fish-tayamakãfe, nã paxta põfe keskarafoki. Nããfe

afara chakafamisfoki. Iskafakĩ mato yoipaikani kiki: “Mã foshki repa xateyamax mã Nios ari kaima,” ixõ mato yoipaikani kiki. ³ Akka nõ foshki repa xatexokai nõko chaka nõ soatiroma. Cristo Jesús noko nãxoni nõko chaka noko soaxoxiki. Niospa ãfe Fakeõxõ ãfe fakefo noko imatiro. Æfe Yõshi Sharaõxõ nõ Nios yoitiro iskafakĩ: “Nõ mia noi. Mĩ sharakõi,” ixõ nõ yoitiro. Nãskakẽ nõ akiki inimakõi ares fisti noko nimatiro. Mã nõ tãpia nõ foshki repa xateaõxokai noko afeska fatiroma. ⁴ Fetsafãfe yoikĩ iskafakani: “Ë shara famis. Nãskax ã Nios fe ãpanaka,” ixõ shinãifono, ãri anori shinãpaiki ã shinãkĩ finapaoni. ⁵ Mẽ kãiax ocho nia ã oxano ea foshki repa xatenifo. Æfi israelikõikĩ, ãkai osiama. Benjamín ãfe xini ipaoni, ãfi ãfe fenaki. Æfe epa feta ãfe ãfa hebreoxomã ea fake fiafono, nãskakẽ ãri hebreo. Askatari fariseo ã iyopaoni, nãskaxõ Niospa Moisés yoipaoni keskara ã nikakõipaoni ãmã fariseoxõ. ⁶ Askatari Niospa meka nikasharapaikõikĩ a Nios Ifofaafo ã ato chakafapaoni. Askatari ã isharapaikõikĩ Moisés yoini keskara ã nikasharakõipaoni. Nãskakẽ eõnoa yoikĩ tsõa iskafatiroma: “Na Pablokai Moisés yoini keskara nikakõipaonima,” ixõ tsõa yoitiro.

⁷ Akka nãfo taeyoi ã õia ãfenã sharafinakõia iyopaoni. Akka iskaratĩ ã õia afokai anã afama. Cristo Ifofakĩ afo ã anã shinãima mẽ shinãmakikõia. Cristo fisti Ifofakĩ afe ãpaxakĩ. ⁸ Akka a ã ipaoni keskara anã ã shinãima. Nãfo mẽ shinãmakikõia, afo shinã ã finakõia ipaoni. Akka ã shinã afokai afama, nã afara chaka potamea keskarafo. Akka ãfe Ifo Jesucristo fisti ã tãpipaikõi, nãfi sharafi-

nakōiaki. Ares fisti ea imasharatiro, a Moisés yoini keskarakai ē anā nikatiroma ea imasharanō. ⁹ Askatamaroko ē Cristo chanīmara faino Epa Niospa āfe Fakeoxō ea imasharatiro a keskara shara ē inō. Akka ē Nioski nokoaino ekeki inimatiro, ē Cristo fisti chanīmara fakē ea imasharanō. ¹⁰ Ē Cristo tāpipaikōi afe rafesharaxiki. Niospa āfe kerex sharayaxō Cristo anā otofani keskai, ēri āfe kerex shara mepai a keskara shara ea imanō. Jesucristo omiskōini keskai ēri aōnoax omiskōipai. Jesús naani keskai ēri askapai a keskara ixiki, afaa chakafaxikima, askatari afaa chaka shināxikima. ¹¹ Nāskakē a chakafo kachikiri fata, nā Jesús keskara sharakōi ē ipai, oa yora naax anā otoa keskara shara.

Ē Jesús Ifokōi fai nā ē akiki nokoaitia

¹² Ē isharakōira ē ifiax ēkai isharakōiama. Askatari Jesús keskara ē ipaifi ē askakōima. Jesucristo ea Ifofamani ē a Ifofanō. Nāskakē ē Jesús Ifofakōini a keskara sharakōi ixiki. ¹³ Efe yora mīshtichi, ē Jesús keskara iyamaiafi a ē ipaoni keskara ē anā shināima. Akka ē Jesús fisti Ifofai. Nā feronāfakefo ichokani xonōnōnākī texkeakekafā ōitirofoma. Nā ifi nīchiti nia ari fisti ōiax ichotirofo keskariakī afara chaka shinākima Jesús fisti ē shināmis a keskara sharakōi ixiki. ¹⁴ Nāskaxō afaa fetsa ē shināima. Nā Cristo Jesús ē shināmis Ifofapaikōikī. Akka Niospa ea katonī ē afe ipaxanō, Cristo Jesúsōnoax Epa Nios ari ē nokotiro, ariax a keskara sharakōi ixiki.

¹⁵ Mā Jesús Ifofakī nā ē mato yoimis keskafakī nānorikōi shinākāfe. Akka fetsafāfe a ē shināi keskara shināyamaifono, Niospa ato tāpimakī mēstekōi shara ato yoixii. ¹⁶ Akka nāfo nō

tāpiax, shināsharakōita nō isharakōitiro, mā nōmāi Jesucristoōnoa tāpiax.

¹⁷ Efe yora mīshtichi, ē Jesús Ifofaa keskakakī māri Ifofakāfe. Mā nō mato ōimamiskī, nō ikai keskai māri askakāfe. ¹⁸ Mē mato mēxotaima yoitaifamis, nāskafekē afianā ē mato yoi oiayanā. Akka fetsafāfe na ē mato yoiai keskara nikakaspakani. Āto chaka xatekaspakakī Jesucristo ifi cruz ikakinoax noko nāxoni nikakaspakani. Nāskakanax Jesús noikaspayanā ikafo. ¹⁹ Jesús ato amapaiyai keskara shinātama āa apaiyaifo keskara fisti shināmisfo. Nā piai fisti shinākata, a ayai fisti shināmisfo. Feronāfakefāferi kērofo shināmisfo, āto āfifoma. Kērofāferi feronāfake fetsafo shināmisfo āto fenefoma. Nāskara chakafos shinākī, nā keskara fisti tāpiafo. Akka nō chakama, nō isharakōimis imisfo. Nāskakanax rāfitirofoma, nā keskarafo mā keyokani. Askatari nā omiskōipakenakafo mēra fokani. ²⁰ Akka nōfi askaramakī, nō Niospa fakefokī nō afe nai mēra īpanaka. Akka nō manai a noko Ifimis nai mēranoax oxō noko ifiyonō, nōko Ifo Jesucristo. ²¹ Nāato nōko yora chakakē noko fetsafaxoxii afe yora keskara sharaḡfinakōia nō inō. Nāskaxō āfe kerex sharaōxō nōko yora noko fenasharafaxoxii afara chakafo nō finōinīfofanō.

4

Nōko Ifo Jesúsnoax mēxotaima inimaḡafāikāfe

¹ Nāskakē efe yora mīshtichi, ē mato noikōikī ē mato ōisharapai. Nā ē mato shināitīa ē mea ē ini-makōikakāini. Nāskakē ēfe fakefāfe, Jesús kachikiri fayamakāfe. Ifo sharakōi fakāfe.

² Akka a xotofake rafe Evodia yafi Síntiqui ã ato yoisharapai mēnāpaikakīma isharakōinōfo nā yora fisti keskarakanax nōko Ifoōnoax. ³ Yamā, mī efeta Nios yonoxomiskī, ã mia yoinō nā kēro rafe ato yoisharafe isharanōfo. Nā rafeta efeta Niosnoa meka shara yoimisfoki afe ĩpaxanōfo. Clementeri nofeta yoimis. Fetsafāferi efeta Niosnoa yoipaonifo. Nāskakē āto anefo Niospa mā kirikaki kenea afe ĩpaxanōfo.

⁴ Nāskakē Jesús mātō Ifokī mēxotaima inimakāfe. Afianā ã mato yoi, inimaifinakōikāfe. ⁵ Nāskakē isharakōikāfe keyokōichi mato ōinōfo, isharakōiafora mato fanōfo. Mā chaima nōko Ifo oi kiki.

⁶ Nāskakē afara afeskara afiaino shināchakayamakāfe, askatamaroko mēxotaima Epa Nios kīfiki. A mā fichipaiyai keskara yōkakāfe iskafakī kīfikī: “Aicho Epa Nios, mī ea nikasharakōimis. A ã yopai keskara tāpixō mī ea axosharamis,” ixō kīfikāfe. ⁷ Nāskakē mā ratepaiyaito Niospa mato inimamasharakōixii. Afara afeskara ifiaino Niospa nōko ōiti noko inimamaxotiro. Nāskakē nō tāpitiroma afeskaxora nōko ōiti noko inimamaxotiro. Askafiano Cristo Jesús nō chanīmara faino noko shināmasharatiro. Afara sharafoōnoa shinākāfe.

⁸ Efe yora mīshtichi, ã kirika kenekī keyokerana. Afara nā chanīmakōi fisti shinākāfe, askatari afara sharafos shinākāfe, askatari nā noko mēstekōi shināmatiro shinākāfe, yorafāfe a afara sharafaifo keskarari shinākāfe, a Niospa noko axōai keskarafori shinākāfe. Askaxō nōko Ifo aicho fakāfe.

⁹ Afara a ã mato yoiai keskara yafi a ã mato tãpimana keskara akãfe. Nãskaxõ afara fetsa ã akaito mã õia keskafakĩ, mãri askafakãfe. Mã askaito õikĩ Niospa mãto õiti mẽra mato inima-masharakõitiro. Nãskax mato fe isharapakenaka.

Filipos anoafãfe kori ichanãfakaxõ Pablo foman-ifo

¹⁰ Ë nõko Ifoõnoax inimakõĩ, taeyoi mã ea kori manamayopaofinixakĩ anã mã ea manamisma. Akka iskaratĩa ea shinãkĩ mã mã ea manamana ã aõ pinõ. Akka ea shinãmakiafora ã mato faima, ea manamatiroma meekĩ mã ea manamamisma. ¹¹ Ë afaayayamafixõ ea afaa inãfoma ã mato famisma. Ë shinãchakaima, Niospa anori ea tãpimana. Ë afaamais fiãx ã inimatiro, askatari afara ichapayax ã inimatiro. ¹² Akka mẽ tãpia afaamaisax afeskax ã itiromãki. Askatari mẽ tãpia a afara ichapayax ã itiro. Askatari mẽ tãpia afara afeskara ifiaino ã inimatiro. Nãskakẽ ã shinãchakaima. Askatari mãyaxri ã inimatiro, fonãifiari ã inimatiro. Afara mekefaxri ã inimatiro, afaa meke fayamafiãxri ã inimatiro. ¹³ Afara fetsafo ã atiro Cristo ãfe kerex shara ea inãno.

¹⁴ Nãskafekẽ mã ea shinãkĩ mã ea sharafa ã omiskõiaito. ¹⁵ Akka Filipos anoxõ mã mã tãpia, nã ã Jesúsnoa meka shara yoikĩ taefanitĩa noko ifipakexanõ. Akka ã Macedonia anoax kaino, mã Nios Ifokõifaxõ, mã ea kori manamani, ãmã Niosnoa mato tãpimanano. Akka fetsafãfe ea afaa manamanifoma. ¹⁶ Ë Tesalónica ano iyoano, ã kori yopaito mã ea femayopaoni. ¹⁷ Akka ã shinãima a ã afara fiãi fisti. Askatamaroko ã shinãĩ mã ea

sharafaino Niospa mato sharafa fafafaĩnõ, mato noikĩ. ¹⁸ Nãskakẽ iskaratĩa ẽ anã afaa yopaima, mẽmãi ayaxõ. Ipafrodito ea fexoyamea a mã ea manamayamea tii. Nã ẽ fichipaiyai tiimaroko finõmainĩfofã mã ea femayamea. Nã mã Nios noiai keskafakĩ eari noikĩ mã ea femayamea. Mã ea askafaito õi matoki Nios inimakõixii. ¹⁹ Ẽfe Niospa nã mã fichipaiyai tii mato inãxii. Epa Niosnã ẵfe afara sharakõifo nã ichapakõifo keyonakama, ẵfe Fake Cristo Jesúsxõ mato inãsharaxii. ²⁰ Akka nõko Epa Niosfi nõko Epakõikĩ nã fãsi sharakõi, tsoa keskarama. Ares fisti sharakõi. Tsõakai a finõtiroma. Nã nõko Ifokõira nõ fapanaka. Askara ipainõra.

Pablo mã mekai xatekĩ Filiposo anoafõ meka shara ato fomani

²¹ Eõxõ keyokõi a Cristo Jesús Ifofaafõ ea ato yoisharaxokẵfe. Askatari na nono efe ikafẵferi nã Jesús Ifofaafẵfe mato yoisharakani kiki. ²² Na nono ikafẵfe Nios Ifofakanax, xanĩfo César ẵfe pexe ano yonomisẵfe afẵferi mato yoisharakani. ²³ Nõko Ifo Jesucristo mato noikĩ mato sharafanõ. Nã tii ẽ mato yoi.

Pablo

Niospa meka fena Jesucristo^{noa} New Testament in Yaminahua (PE:yaa:Yaminahua)

copyright © 2008 Wycliffe Bible Translators, Inc.

Language: Yaminahua

Translation by: Wycliffe Bible Translators, Inc.

Yaminahua [yaa], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yaminahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 11 Nov 2022 from source files
dated 29 Jan 2022

6c7b7ce2-9d87-5405-91e6-71ce1387adcc